

МЕСЯЦА ФЕВРАЛЯ 8-Й ДЕНЬ.

СВЯТАГО ВЕЛИКОМУЧЕНИКА ФЕОДОРА СТРАТИЛАТА, И СВЯТАГО ПРОРОКА ЗАХАРИЯ
СЕРПОВИДЦА

На Господи, воззвах: стихиры мученика 3 и пророка 3.

Стихиры мученика, глас 4.

Подобен: Яко добля:

Страдалец доблественный, * воин непобедим * Духом Святым показался еси, * низложив борителя * мудростию словес твоих * и дел твоих, мудре, терпеливными явленьми. * Темже приял еси венцы победныя * и с вышними лики сочетался еси, * великомучениче Феодоре.

Божественный столп был еси * благочестия, пребогате, * злочестивых капищ возгнушався, * и овча всесовершенно, * и заколение благоприятно * заклавшемуся тебе ради, чисте приводим * прославльшему святую твою память * и чудес сокровище тя сущим в мире * даровавшему, Феодоре.

На крест воздвижен, * и плоти стружеме, * и острыми стрелами уязвляемь, * и на древе протяжаемь, * и мечи усекаемь, * и всякими хитростями болезней окружаемь, * непреклонен и непобедим явился еси * силою на Кресте Пригвожденнаго, * слава мучеников, Феодоре.

Ины стихиры пророка, глас 8.

Подобен: Что вас наречем:

Имея житие равноангельно, * со Ангелы, Богоявленне, беседеши яве. * Теми убо яже паче ума * просвещая ум, * образов чудных очищение, * великих таин откровение, * пророческое провещание, * духовное возновление, * моли спастися душам нашим.

Ангел явился еси землен, * на земли Небесныя собеседники имев, * зритель премирных видений быв, * светильник мысленный, свет облистающ, * маслина, псаломски рещи, плодовига, * Богодейственно искапающею благочестивым елей, * моли спастися душам нашим.

Надеемаго обожения наслаждаяся, * яко пророк истиннейший Божий, * и ясно присносущныя насыщаяся сладости, * и славу неизглаголанную видя, * и доброты венцы украшен, * о нас, поющих тя, моли * прилежно, Богоприятне, * спастися душам нашим.

Аще есть пост, Слава, и ныне, Богородичен или Крестобогородичен *(писаны в 18-й день)*. Аще ли несть поста, поем и самогласен святого.

Слава, глас 8:

Божиих даров яко тезоименита * и того наследника блаженства вси восхвалим, вернии, * и ублажим по достоянию Феодора, добляго великомученика, * вселенныя поборника, * молится бо Христу Богу о душах наших.

И ныне, праздника, глас тойже:

Иже на Херувимех носимый и певаемый от Серафим, * днесь в Божественное святилище по закону приносим, * на старческих, яко на престоле, седит руках * и от Иосифа приемлет дары Боголепно, * яко супруг горлицищ, * нескверную церковь и от язык новоизбранныя люди, * голубина же два птенца, * яко Начальник Ветхаго же

и Новаго. * Еже к Нему обещания Симеон конец прием, * благословя Деву Марию Богородицу, * страстей образы, иже из Нея, провозгласи * и от Него прошаше отпущения, вопия: * ныне отпусти мя, Владыко, якоже прежде возвести ми, * яко видех Тя, Первовечнаго Света * и Спаса Господа христоименитым людем.

На стиховне стихиры, глас 2.

Подобен: ДOME Евфрафов:

Двери Небесныя, отверзитеся, * Христос бо в церковь * яко Младенец * Материю Девую * Богу и Отцу приносится.

Стих: Ныне отпускаеши раба Твоего, Владыко, * по глаголу Твоему, с миром.

Угль, проявлейся * Божественному Исаии,— Христос, * яко клещами, * руками Богородицы * ныне старцу дается.

Стих: Свет во откровение языков * и славу людей Твоих Израиля.

Страхом же и радостию * на руках Владыку * Симеон держа, * живота прошаше разрешения, * поя Богоматерь.

Слава, глас 5:

Днесь возсия паче денницы * честная память страстотерпца Христова, * верных сердца невидимо просвещающи * и облаки душ отгоняющи * действием и благодатию Духа. * К немуже, мучениколюбцы, воззовем: * радуйся, иже верным явлься Богодарованная благодать * и чудес множества простирая к тебе притекающим, Феодоре блаженне. * Христа непрестанно моля, не оскудей * вечных благ получитьи * верою совершающим всечестную память твою.

И ныне, праздника, глас тойже:

Ветхий деньми, младенствовав плотию, * Материю Девую в церковь приносится, * Своего закона исполняя обещание. * Егоже Симеон прием, глаголаше: * ныне отпускаеши с миром, по глаголу Твоему, раба Твоего, * видеста бо очи мои спасение Твое, Святыи.

Тропарь мученика, глас 4:

Воинствословием истинным, страстотерпче, * Небеснаго Царя воевода предобрый был еси, Феодоре, * оружиеми бо веры ополчился еси мудренно, * и победил еси демонов полки, * и победоносный явился еси страдалец. * Темже ты верою * присно ублажаем.

Слава, и ныне, праздника, глас 1.

Радуйся, Благодатная Богородице Дево, * из Тебе бо возсия Солнце Правды — Христос Бог наш, * просвещаяй сущия во тьме. * Веселися и ты, старче праведный, * приемый во объятия Свободителя душ наших, * дарующаго нам воскресение.

На УТРЕНИ

На Бог Господь: тропарь праздника, глас 1.

Радуйся, Благодатная Богородице Дево, * из Тебе бо возсия Солнце Правды – Христос Бог наш, * просвещаяй сущия во тьме. * Веселися и ты, старче праведный, * приемый во объятия Свободителя душ наших, * дарующаго нам воскресение.
[Дважды]

Слава, мученика глас 4:

Воинствословием истинным, страсотерпче, * Небеснаго Царя воевода предобрый был еси, Феодоре, * оружиями бо веры ополчился еси мудренно, * и победил еси демонов полки, * и победоносный явился еси страдалец. * Темже ты верою * присно уболажаем.

И ныне, праздника.

По 1-й стихологии седален, глас 3.

Подобен: Красоте девства:

От Девы Ты воплощенна, Христе, радуясь, подъят священный Симеон,– * ныне отпускаеши,– вопия,– раба Твоего, Владыко. * Анна же непорочная, пророчица и славная, * ныне исповедание и пение приносит Тебе. * Мы же, Жизнодавче, вопием Ти: * слава тако благоволившему.

Слава, и ныне, тойже.

По 2-й стихологии седален, глас 8.

Подобен: Свирелей пастырских:

Родился еси на земли, Собезначальный Отцу, * принеслся еси в церковь, Непостижимый, * радуясь же, старец на руки Ты восприят, зовый: * ныне отпускаеши, егоже посетил еси по глаголу Твоему, * благоизволивый спасти, яко Бог, род человеческий.

Слава, и ныне, тойже:

Канон праздника, со ирмосом на 6, и святых два, на 8

Канон мученика, глас 8.

Песнь 1

Ирмос: Колесницегонителя фараоня погрузи, * чудотворишь иногда * Моисейский жезл, крестообразно поразив * и разделив море, * Израиля же, беглеца, пешеходца спасе, * песнь Богови воспевающа.

Божественными яве светлостьми удобряясь, страдальческим венцем священиоукрашаемь и славою облистаемь Святыя Троицы, хвалящия ты поминай, великий в мученицех Феодоре.

Исполнь света, исполнь Божественныя благодати, нам возсия священная память честных подвигов твоих, пресветлыми светлостьми озаряющи всех, благочестно ты почитающих, мучениче страсотерпче Феодоре.

Идольстей одержавши бури человечество, священный мученик, окормляемь Креста Божественною благодатию, небурно преплыв, и в пристанища достиже Небесная, радуясь.

Богородичен: Двере Божия, покаяния двери ми, Дево, отверзи, помышленьми Божественными душу мою просвети и страстей отжени тяжкия облаки, яко да почитаю, радуясь, и должно ублажаю Тя.

Канон пророка, глас 8.

Песнь 1

Ирмос: Поим Господеви, * проведшему люди Своя сквозе Чермное море, * яко Един славно прославися.

Имея Светодавца, твоя послушающа мольбы, просвещение ми подаждь, Захарие, пророче пречудный.

Украшен добротами Божественныя красоты, Ангелов доброты зриши душевною чистотою.

Исполнен святыни ангелоподобныя светлости яко сый, Богомудре, соглаголющия Ангелы и просвещающия имел еси, Богопостижне.

Богородичен: Разрешися клятва Евы праматере, Всенепорочная, Христа бо рождши, благословеньми мир обогатила еси.

Песнь 3

Ирмос: Утверждей в начале Небеса разумом * и землю на водах основавый, * на камени мя, Христе, заповедей Твоих утверди, * яко несть свят, паче Тебе, * Едине Человеколюбче.

Яко лев, дерзнув, посреди судища стал еси, возвещая спасительное слово, досаждая злочестивым, проповедавая истину и обличая лжу безбожия, Феодоре.

Мучитель, удивлься твоему мужеству, мудре, скотскою яростию подвигся, жилами волюями нещадно ураняет тя, Феодоре, мерзким истуканным сокрушение соделавша.

Мужеским помыслом язвения капли, яко волны морския, Богомудре, отринул еси, Креста благодатию укрепляемь и венценосец Божественнаго Духа силою являясь.

Богородичен: Сотвори воистинну Тебе величие иже от Тебе рождейся Господь, и роди вси Тя, Божию Матерь, славят.

Ин

Ирмос: Несть свят, яко Господь, * и несть праведен, яко Бог наш, * Егоже поет вся тварь, * несть праведен, паче Тебе, Господи.

Вышняя благодать тебе осени промышления несказаннаго Божественно окормление, святыми Ангелы научающыи, премудре блаженне, и просвещающыи.

Божественней благости наказуясь, научился еси, пребогате, яко пречист, плодовиит жити Божественным священием во граде всеосвященнем.

Стена незыблема, утверждение людем Богомудрым был еси, Господи, и душам спасение, якоже древле провозвести пророк чудный.

Богородичен: Рождество нетленно и пречисто, Богородице, Твое чревоношение мир избави от тли и смерти, Спаса бо родила еси, Слово Присносущное.

Кондак и икос праздника.

Седален мученика, глас 8.

Подобен: Премудрости:

Божественное всеоружие восприм и идольскую лесь низложив, * Ангелы воздвигл еси восхвалити подвиги твоя, * Божественною бо любовию ум распалив, на огненную смерть доблественно дерзнул еси. * Темже тезоименитно просящим тя даеши Божественная дарования, страсотерпче Феодоре. * Сего ради вопием ти: * моли Христа Бога прегрешений оставление даровати * празднующим любовию память твою.

Слава пророка, глас 3.

Подобен: Красоте девства:

Впряжены колесницы видел еси, * правимы рукою всех Бога, безплотныя слуги, * Захарие чудне, * с нимже радуяся, яко пророк приснопамятный, * моли направитися к пути Божественнаго разума * верою несомненною совершающим память твою всесвященную.

И ныне, праздника, глас 1.

Подобен: Лик Ангельский:

Сый со Отцем на престоле святем, * пришед на землю, от Девы родися * и Младенец бысть, леты Сый неописан. * Егоже прием Симеон на руки, радуяся, глаголаше: * ныне отпускаеши, Щедре, возвеселив раба Твоего.

Аще есть пост, Слава, и ныне, Богородичен; аще среда или пяток, Крестобогородичен. Писаны в 28-й день.

Ин. Песнь 4

Ирмос: Ты моя крепость, Господи, * Ты моя и сила, * Ты мой Бог, * Ты мое радование, * не оставль недра Отча * и нашу нищету посетив. * Тем с пророком Аввакумом зову Ти: * силе Твоей слава, Человеколюбче.

Имея Христа внутри себе, блаженне, вещающа, Ликиниеву гордыню низложил еси словесы мудрыми. Се воистинну, мучениче, обличил еси премногое безумие и дела преславными зряция удивил еси, страдальче доблемудренне Феодоре.

Повешен быв беззаконием мучителя, и ногтями истерзаемь, и обагрен каплями, мучениче, неправедно изливаемых кровей твоих, умерщвления дебелства и тли совлекл еси ризы, преблаженне Феодоре.

Богородичен: Лукавое грехов моих рукописание Божественным копием, Пречистая, расторгни, прободшим Божественная ребра вочеловечитися из Тебе, Дево, восхотевшаго, и в книзе мя написати спасаемых молися, без ума от Бога удаляшася.

Ин

Ирмос: Из горы приосененныя, Слове, пророк, * Единыя Богородицы, * хотяща воплотитися Боговидно усмотри * и со страхом славословяще силу Твою.

Едино убо просвещательное существо чести, в солнцех же трех определяемо, в сущая прошествиями множимо, яве научаеши, всеблаженне.

Колесница Божия быв, пророче, колесницы зря различны Ангельския, обходити вся сподобился еси, со благочинием идуция.

Священнолепно многосветлый свещник, образ зриши Божественного светозарения, смотри же, всеблаженне, Всевидца, Имже всяческая спасаются.

Богородичен: Образ Твоего чистаго Рождества Боговиднии пророцы проначертуют, многовидно прообразивше и различно гаданьи Богомудрии.

Песнь 5

Ирмос: Вскую мя отринул еси * от лица Твоего, Свете Незаходимый, * и покрыла мя есть чуждая тьма, окаяннаго, * но обрати мя и к свету заповедей Твоих * пути моя направи, молюся.

Просвещаемъ зарею, мучениче, Божественнаго Духа и распяемъ Христовою любовию, опаляемъ плоти нерадил еси, ни ощутил еси болезни, ни вменил еси муки, Небесными надеждами питаемъ.

Иго Владыки нося на выи прелегкое, олова тяготою, стратотерпче преблаженне, отягчен, не преклонился еси отнюд, ни поколебался еси, ниже победился еси, воине доблий Феодоре.

С Небесе пригласив тя Преблагое Слово, дерзостна сотвори, Егоже силою горькия болезни претерпел еси беззаконнующих, мучениче Христов, и муки и нужную, славне, смерть.

Богородичен: Пребывати мя цела, непреложна стояния лучшаго, но праве шествующа и Богоугодная деющая, Благая, умоли, Благаго рождши Слова, нас безсловесия избавльшаго.

Ин

Ирмос: От нощи неведения * Боговедением просветивый концы, * просвети мя утром человеколюбия Твоего, Господи.

Чистым сердцем и ума провидя острою страсть Спасову, достолепно блажится.

Преестественно святыи радуйся, Сионе, пророк предповелевает, грядет Царь твой, праведен и спасаей кротостию.

Пророков слава, Богоглаголивых мужей благолепие мир озаряет пророчества светлостию.

Богородичен: Девы Рождеством обновив нас, свободи первых согрешений, нас ради быв Человек.

Песнь 6

Ирмос: Молитву пролию ко Господу * и Тому возвещу печали моя, * яко зол душа моя исполнися * и живот мой аду приближися, * и молюся, яко Иона: * от тли, Боже, возведи мя.

Страсть Безстрастнаго воображая, распялся еси, славный мучениче, пригвоздився на древе, преблаженне, и подобник Владыце был еси, разрешившаго Крестом человеческия страсти волею.

Повешен, яко агнец, на древе, и стрелами сострелян, блаженне, и очес зеницы избоден, и уязвлен по всему телеси, уязвил еси врагов сердца кошием болезней твоих.

Потопы безмерных мук, ко храмину припревшеся, мучениче, твоя души, не поколебаша сея: на недвижимем бо камени утвердися просиявшего от Девы и человеческий род просвещшаго.

Богородичен: Марие, всего мира Госпоже, яко Господа всех рождши, вражия работы мя избави, и того мучения исхити, и спаси мя, на Тя несомненно уповающаго.

Ин. Ирмос тойже.

Сый пророческаго исполнь вдохновения, будущих разума паче естества научився, послан был еси проповедати благодать будущую, день же креста ведомый Господеви, Богоприятне.

Разумом духовным украшен, даров сущих паче ума сподобился еси, Ангельская явления, и чины, и вещания, и славы видеи, пребогате, чудным научающия и Божественным тайнам.

Свещу добродетелей стяжав, просвещением Богоразумия сияеши, таинственную провозвещающа свещу, еюже паче словесе Слова воплощение явится Боголепне от Сиона, Захарие, пророче Богоприятне.

Богородичен: Поставивый Небо показа Тя Небо словесное, Богородице, доброту Иаковлю возлюбив, и из чрева Твоего Божества Солнце возсия плотски, и мир уяснил еси благодатию.

Кондак, глас 2.

Подобен: Вышних ища:

Мужеством души в веру оболкийся * и глагол Божий, аки копие, в руку взем, * врага победил еси, мучеников превелий Феодоре, * с ними Христу Богу моляся не престай о всех нас.

Икос: Страдальцев пресветлую доброту, приидите вси, песненными венцы, вернии, Феодора венчаем, дар бо Божий велик миру явился сияньми чудес, врага бо победив Велиара страдания честными, одождает вместо кровных капель исцелений токи, с сими убо всеми радуется Христу и дает мир неоскуден. Тем вопием Ему: моли непрестанно о всех нас.

Песнь 7

Ирмос: Божия снисхождения * огонь устыдися в Вавилоне иногда, * сего ради отроцы в печи радованною ногою, * яко во цветнице, ликующе, пояху: * благословен еси Боже отец наших.

Глаголаше, радуясь величия Вседержителя, темже удивльшися, зрящии, прелести оставиша мучительство и верою вопияху: благословен еси, Боже отец наших.

Пленицами премудрых твоих словес, преблаженне, радуясь, уловил еси из глубины неразумия приступающия и Божественны мученики соделал еси, Феодоре, поющия: благословен еси, Боже отец наших.

В темнице к древу ты связана Ангел свят, пришед, разреши, дерзновение дая и укрепляя ты велегласно вопити, Феодоре: благословен еси, Боже отец наших.

Богородичен: Мене, живша в лености и презревша святя Твоя законы и честныя Твоя, Христе, заповеди, ущедри и спаси Рождшия Тя ради, яко Благодетель Бог и Многомилостив.

Ин

Ирмос: Отроцы еврейстии в пещи * попраша пламень дерзновенно * и на росу огнь преложиша, вопиюще: * благословен еси, Господи Боже, во веки.

По всей земли твое, пророче, изыде вещание Богодохновенное и глагол твоих сила, вопиющих: благословен еси, Господи Боже, во веки.

Весь вышними зарями просвещен, будущая видел еси, яко суцая. Темже, пребогате, вопиял еси: благословен еси, Господи Боже, во веки.

Богородичен: Песньми почитаю Тя, Дево, почетшую род человеческий, безчестием лютым первее осужденный: благословен, Всечистая, Плод Твоего чрева.

Песнь 8

Ирмос: Седмерицею пещь * халдейский мучитель * Богочестивым неистовно разжже, * силою же лучшею спасены, сия видел, * Творцу и Избавителю вопияше: * отроцы, благословите, * священницы, воспойте, * людие, превозносите во вся веки.

Светло подвизався, врага победил еси, и потребль воинства его оружии веры. Темже победным венцем увязал еси, поя Владыце: отроцы, благословите, священницы, воспойте, людие, возносите во вся веки.

По распятии, славне, по страсти блаженней, по безмерных ранах, блаженне, Богу выно твою приклонил еси, мучениче мудре, мечем честная глава твоя усечена бысть, зовый Владыце: отроцы, благословите, священницы, воспойте, людие, превозносите во вся веки.

Священное, Феодоре, и многострадальное тело твое источник исцелений верным бысть, из негоже почерпают благочестное притекающий разрешение страстей и душ спасение, вопиюще Владыце: отроцы, благословите, священницы, воспойте, людие, превозносите во вся веки.

Богородичен: Умерщвленную оживи, падшую возстави, узвленную душу мою исцели, ум мой умири, напастей волны укроти, Дево, и вопиюща мя спаси: отроцы, благословите, священницы, воспойте, людие, превозносите Господа во вся веки.

Ин

Ирмос: На горе святей прославльшася * и в купине огнем Приснодевы Моисеови тайну явльшаго, * Господа пойте * и превозносите во вся веки.

Сионе, горо, граде святой, радуйся зело,— Божественный Захария, Ангелов собеседник, повелевает,— и ты веселися, Иерусалиме, во вся веки.

Захарие пророче, красуйся, исполньшаяся видя словеса, яже предглагола еси, Духом просвещаемь, Господа поющим и превозносящим Его во веки.

Посреди гор присенных видел еси стояция Ангелы, иже над всеми промыслению научающия тя, славный пророче, песнословяция Христа во веки.

Богородичен: Радуйся, престоле огнезрачный Господень, радуйся, двере невестственного сияния, радуйся, облаче легкий, яже Солнце Правды возсиявшая миру, Чистая Богородительнице.

Песнь 9

Ирмос: Ужасеся о сем Небо, * и земли удивися концы, * яко Бог явися человеком плотски * и чрево Твое бысть пространнейшее Небес; * тем Тя, Богородицу, * Ангелов и человек чиноначалия величают.

Освятил еси, Богомудре мучениче, сам себе пожершемуся Агнцу и Богу нашему, возвысився, яко всеожжение благовоно, к Нему, и священно возложение, и совершенна и чиста благоприятна жертва. Темже тя восхваляем и по долгу ублажаем.

Яко утро, яко день светозарен, явился еси, Феодоре, солнце, светлыми твоего страдания лучами и чудеса, всеблаженне, подсолнечную благочестно просвещая и отгоняя тьму прелести и страстей наших, Феодоре.

Совокупился еси со Ангелы плотию, безплотныя враги побежда, и со страдальческими лики веселишия всегда, и с ними Божественную песнь Троице возглашаеши, Феодоре преблаженне, светильниче церкви и страсотерпщев удобрение.

Земля положением твоего честнаго, Феодоре, телесе освящается, Небо же радуется, дух твой священный стяжав; всегда человецы, память твою честную творяще, молебнo просим тя молитвенника о нас, преблаженне.

Богородичен: Боголюбивая Дево, Благого моли спасти мя от скверн всех, язвы сердца моего омывши покаянием чистым и плачем слезным, да Тя ублажаю и величаю, Пренепорочная.

Ин

Ирмос: Тя, Неискусобрачную Матерь Бога Вышняго, * Тя, паче ума рождшую словом воистинну Бога, * вышшую Пречистых сил, * немолчными славословении величаем.

Всяко чувство оставив, уму Божественному и чистейшему, всемудре, светоносен предстоиши, о мире молитвы твоя. Темже вси тя, Захарие, блажим.

Глаголом последующе твоих устен, Богоявленне, Господа призываем. Имже спасаеми, яко истины ты пророка и проповедника, Захарие, благочестно блажим.

Милостива содейай твоими молитвами Владыку, священный и благознаменитый праздник твой, Богодохновенне, верою совершающим и ты любовию чтущим, яко пророка и Богоглагольника истиннейша.

Богородичен: Бездну чудес Ты и дарований, Богородице, пучину, Чистая, ведуще и яже знающе, в Твое предстательство, надеющеся, притекаем и спешно к Твоему крову прибегаем.

Светилен мученика.

Подобен: Духом во святилищи:

Полки врагов и демонов наглости до конца низложил еси * и кончину приял еси, Феодоре блаженне, веры ради Зиждителя твоего, * яко свидетель истины, спасаеши всех от всяких скорбей и вреда чуждаго.

Слава, и ныне, праздника.

На стиховне стихиры праздника, глас 1.

Подобен: Всехвальнии:

Яко воистинну пресветлый * Божий ковчег, Чистая, * очищение днесь Христа принесши, * в церковь вносит * и честно полагает * на руки Симеона Богомудраго, * темже освятишася * святых ныне святая * и Единому Святому срадуются.

Стих: Ныне отпускаеши раба Твоего, Владыко, * по глаголу Твоему, с миром.

Прославися днесь, * Христа Симеон, яко угаь, * Боголепно прием, * и облобызает, очищъ устне, * исповедается же, и радуется, * и просит отпущения. * Того убо вси, благочестно * ныне ублажающе, * немолчными песньми почитаем.

Стих: Свет во откровение языков * и славу людей Твоих Израиля.

Дверь одушевлена, Чистая Дева * днесь Царя и Господа, * Егоже внутрь имеяше, * в церковь вносит, дверьми входяща, * древле тайно затворенными на земли. * Темже, ликующе пред лицом Ея вси, * Божественными песньми Ту восхвалим.

Слава, святаго, глас 8:

Страдальческий составив подвиг, * на прелесть мужествовал еси, Феодоре: * огневещанным языком твоим посрамил еси Ликиниеву безчеловечество. * Темже и, со Ангелы радуясь, блаженне, * моли Христа Бога, * яко да Милостив будет нам в день Судный.

И ныне, праздника, глас 5:

Испытайте писания, * якоже рече во Евангелиих Христос Бог наш, * в них бо обретаем Того, раждаема * и пеленами повиваема, в яслех полагаема * и млеко питаема, * обрезание приемлюща и Симеоном носима, * не мнением, ни привидением, но истиною миру явльшася, * к Немуже возопиим: * Превечный Боже, слава Тебе.

НА ЛИТУРГИИ:

Блаженны праздника, песнь 8-я и святого, песнь 6-я.

Страсть Безстрастного вообразая, распялся еси, славный мучениче, пригвоздився на древе, преблаженне, и подобник Владыце был еси, разрешившаго Крестом человеческия страсти волею.

Повешен, яко агнец, на древе, и стрелами сострелян, блаженне, и очес зеницы избоден, и уязвлен по всему телеси, уязвил еси врагов сердца копием болезней твоих.

Слава: **Потопы** безмерных мук, ко храмину припревшеся, мучениче, твоя души, не поколебаша сея: на недвижимем бо камени утвердися просиявшаго от Девы и человеческий род просвещшаго.

И ныне: **Богородичен:** **Марие**, всего мира Госпоже, яко Господа всех рождши, вражия работы мя избави, и того мучения исхити, и спаси мя, на Тя несомненно уповающаго.

Тропарь мученика, глас 4:

Воинствословием истинным, страсотерпче, * Небеснаго Царя воевода предобрый был еси, Феодоре, * оружиеми бо веры ополчился еси мудренно, * и победил еси демонов полки, * и победоносный явился еси страдалец. * Темже тя верою * присно ублажаем.

Тропарь праздника, глас 1.

Радуйся, Благодатная Богородице Дево, * из Тебе бо возсия Солнце Правды – Христос Бог наш, * просвещаяй сущия во тьме. * Веселися и ты, старче праведный, * приемый во объятия Свободителя душ наших, * дарующаго нам воскресение.

Кондак мученика, глас 2.

Мужеством души в веру оболкийся * и глагол Божий, аки копие, в руку взем, * врага победил еси, мучеников превелий Феодоре, * с ними Христу Богу моляся не престай о всех нас.

Прокимен, глас 7: **Возвеселится праведник о Господе * и уповает на Него.**

Стих: **Услыши, Боже, глас мой, внегда молити ми ся к Тебе.**

Апостол к Тимофею, зачало 292.

Чадо Тимофее, возмогай во благодати, яже о Христе Иисусе, и яже слышал еси от мене многими свидетели, сия предаждь верным человеком, иже довольни будут и иных научити. Ты убо злопостражди яко добр воин Иисус Христов. Никтоже бо воин бывая обязуется куплями житейскими, да воеводе угоден будет. Аще же и постраждет кто, не венчается, аще не законно мучен будет. Трудяющемся делателю прежде подобает от плода вкусити. Разумей, яже глаголю: да даст убо тебе Господь разум о всем. Поминай Господа Иисуса Христа воставшаго от мертвых, от семени Давидова, по благовествованию моему, в немже злостражду даже до уз, яко злодей, но слово Божие не вяжется. Сего ради вся терплю избранных ради, да и тии спасение улучат еже о Христе Иисусе, со славою вечною.

Аллилуия, глас 4: Праведник, яко финикс, процветет, * яко кедр, иже в Ливане, умножится.

Евангелие от Матфея, зачало 36.

Рече Господь Своим учеником: се, Аз посылаю вас яко овцы посреде волков, будите убо мудри яко змия, и цели яко голубие. Внемлите же от человек, предадут бо вы на сонмы, и на соборищах их биют вас. И пред владыки же и цари ведени будете Мене ради, во свидетельство им и языком. Егда же предадут вы, не пещытеся, како или что возглаголете. Не вы бо будете глаголющии, но Дух Отца вашего глаголай в вас. Предаст же брат брата на смерть и отец чадо, и востанут чада на родители и убьют их. И будете ненавидими всеми имени Моего ради, претерпевый же до конца, той спасен будет.

Причастен: В память вечную будет праведник:

СВЯТОЙ ВЕЛИКОМУЧЕНИК ФЕОДОР СТРАТИЛАТ († 319)

Святой великомученик Феодор Стратилат († 319) происходил из города Евхаит. Он был наделен разнообразными и яркими дарованиями, которые в сочетании с природной красотой выделяли его среди окружающих. В довершение Своих милостей Бог просветил великодушное сердце святого Феодора глубоким познанием христианской истины. Будучи военачальником в городе Гераклее, святой Феодор нес как бы двойное послушание: сочетал ответственное воинское служение с апостольской проповедью Евангелия среди подчиненных ему язычников. Его горячая вера, подкрепленная личным христианским примером, отвращала многих от пагубных привычек. В результате почти вся Гераклея приняла христианство.

В то время император Ликий (307–324) начал жестокое гонение на христиан. Желая разрушить новую веру, он обрушил свои преследования не на простой народ, а на благородных и просвещенных поборников христианства, в которых видел серьезную угрозу для отмиравшего язычества. В числе последних оказался и святой Феодор. Произошло это так. Прослышав о храбрости и красоте святого, император захотел его видеть и послал за ним своих приближенных. Святой Феодор принял послов с честью, но решил пострадать в своем городе. Поэтому он ответил императору, что не может сейчас покинуть Гераклею и просит его пожаловать к нему. Император приехал, захватив с собой золотых и серебряных идолов. Он обласкал святого, очень хвалил его управление городом и, чтобы еще более улучшить положение, повелел ему принести перед народом жертвы идолам. Святой Феодор обещал выполнить повеление, но просил сначала перенести идолов на ночь в свой дом. Слепленный ненавистью к христианству, Ликий поверил словам святого Феодора. Однако его ожидания были обмануты. Завладев драгоценными истуканами, святой Феодор разбил их на куски и роздал нищим. За это он был схвачен и подвергнут жестоким и изощренным пыткам. Нотарий (писец) святого Феодора, святой Уар, едва находил в себе силы записывать, каким тяжелым мучениям подвергали его господина. Предчувствуя близкую смерть, святой Феодор обратился к Богу с молитвой: «Господи, рекл ми еси первее, Аз есмь с тобою, ныне же почто оставил мя еси? Виждь, Господи, яко зверие дивии растерзаша мя Тебе ради,

избодены суть зеницы очес моих, плоть моя ранами раздробляется, уязвляется лице, сокрушаются зубы, едины точию нагие кости на кресте висят: помяни мя, Господи, претерпевающего крест Тебе ради, железо, и огонь, и гвоздие подъях за Тя: прочее же приими дух мой, уже бо отхожду от жизни сей». Однако Бог, по великой Своей милости, пожелал, чтобы кончина святого Феодора, как и вся его жизнь, принесла благие плоды для ближних. Он исцелил истерзанное тело святого и свел его с креста, на котором тот был оставлен на всю ночь. Утром царские воины застали святого Феодора живым и невредимым. Убежденные воочию в беспредельном могуществе христианского Бога, они тут же, недалеко от места несостоявшейся казни, приняли святое Крещение. Так святой Феодор явился «яко день светозарен» для пребывавших во тьме идолопоклонства язычников и просветил их души «светлыми своего страдания лучами».

Святой Феодор, не желая избежать мученической смерти за Христа, добровольно вновь отдал себя в руки Ликиния. Он удержал множество уверовавших во Христа от мятежа против мучителей такими словами: «Перестаньте, возлюбленные! Господь мой Иисус Христос, висая на Кресте, удерживал Ангелов, дабы они не сотворили отмщение роду человеческому». Идя на казнь мимо тюрьмы, святой мученик словом своим отверз темничные двери и освободил заключенных от уз. Люди, прикасавшиеся на пути к его одежде, мгновенно исцелялись от болезней и освобождались от бесов.

По приказу императора святой Феодор был усечен мечом. Перед смертной казнью он сказал святому Уару: «Запиши день кончины моей, а тело мое положи в Евхаите, земле предков моих». Этими словами он просил ежегодного поминовения. Затем, сказав: «Аминь», святой Феодор преклонил голову под меч. Казнь совершилась 8 февраля 319 года, в субботу, в третий час дня.